


Nossa fontauna ei tussegada

Oumarou Maïga* ha 9 onns ed habitescha aunc buc aschi daditg el vitget da Bissa-Nova a Burkina Faso. Siu vegl dacasa ei vegnius destruius avon entgin temps e quei per motiv ch'ins ha aviert leu ina mina d'aur. Oumarou raquenta:



Oumarou va mintga di per aua cun siu asen el vitg vischinont.

„Da cuort ein dus umens carrai cun in auto en nies vitg. Els ein sorti digl auto e vegni neu tier nus e detg che l'aua da nossa fontauna seigi tussegada. Dapi lu mett'jeu sut miu asen mintgadi suenter scola. Cun gl'asen ed il carr, ch'ei cargaus cun in grond butschin e tschun canisters, mon jeu tier la fontauna dil vitg vischinont per aua. Gl'ei in viadi da 2 km distanza. Sper la fontauna spetga gia ina gronda colonna. Perquei vegnel jeu pér treis uras pli tard a casa. En miu vitg d'antruras havevan nus buca tals problems. Mo perquei ch'ins ha aviert leu ina mina d'aur, essan nus vegni catschai naven da leu.

Nies niev dacasa ei 2 km naven dallas ruinas da miu vitg vegl. Bugen seregordel jeu vid il temps che nus habitaven leu. Ella vischinonza cavaven ils umens a maun suenter aur. Nus cuschinaven per els fava cun ris. Cun quella lavur gudignavel jeu el decuors d'in sulet meins 40 frs. Ils daners hai jeu dau a mia mumma. Cun quels daners saveva ella pagar il daner da scola e cumprar vestgadira.

El vitg che nus habitein uss, sun jeu buca ventireivels. Suenter la bardigliada hai jeu adina puspei stuiu bargir. El vitg da pli baul, mav'ei bia meglier cun nus. Leu havevan nus duas vaccas e treis cauras. Pervia dalla mina havein nus piars ina massa terren. Sil funs che ei vanzaus crescha panetscha, terc e sesam. Mo la raccolta tonscha negliu. Duront dus meins savein nus magliar mo duas ga a di.

Jeu sai exact tgei ch'jeu vi daventar inaga: Tgirunz da malsaus. Jeu vi segidar e tgirar ils carstgauns. Jeu mon bugen a scola. Jeu vi emprender e saver bia.

Miu grond hobi ei il ballapei. Mintga sera, cu jeu tuornel digl ir per aua, dun jeu ballapei cun mes camerats. Miu siemi ei da daventar in fetg bien giugadur da ballapei. Lu vi jeu vegnir attaccader tier l'equipa naziunala.

*il num ei midaus